

Or, de la façon que je projecte l'establissemant qu'il convyent fayre pour planter colonyes dans ladicte terre d'Eldorado, c'est jouer à boulle veue et humaynement estre assuré de l'establissemant, pourveu qu'on ayt ledict fonds de cent mille escus pour porter en l'espace de dix-huict moys quinze cens hommes. Avec l'avantage des lieux et assistance de ceulx du pays, on ne doit rien craindre; car, quant ils viendront avec dix mille hommes, ils seront battus.

Touttes les choses cy-dessus sont sy claires et véritables qu'elles me font croire que Vostre Grandeur embrassera ce dessing, et m'asseure que le roy en recepvra ung jour grand contantemant et avantage pour le bien de son royaulme. L'extrême passion que j'ay de voyr bientost reussyr ceste affayre me transporte hors de moy et les jours m'estans des années jusques à l'heure que j'auroy l'honneur d'estre commandé de Vostre Grandeur pour servir de soldat dans ce généreux dessing.

Ce qu'attendant, je finiray ce grossier discours de mathelot en luy offrant mes labbeurs de vingt-troys années que j'ai consommées à la recherche de la congnoissance des quatre partyes du monde, le peu de bien quy me reste avecq ma vye. Et luy feray voyr aux effects qu'il n'y a personne au monde plus zeellé à son service que moy, quy prieray Dieu le reste de mes jours pour sa prospérité, santé, heureuse et longue vye.

LE CHEVALLYER DE RAZILLY.